

**ҮНЭТ ЦААСААР ГЭРЧЛЭГДСЭН ӨМЧЛӨХ ЭРХИЙГ
БУСДАД БЭЛЭГЛЭХ, ӨВЛҮҮЛЭХ ТУХАЙ ЖУРАМ****Нэг. Нийтлэг үндэслэл**

1.1. Энэхүү журмын зорилго нь үнэт цаасаар гэрчлэгдсэн өмчлөх эрхийг бусдад бэлэглэл, өв залгамжлалын журмаар шилжүүлэхтэй холбогдсон харилцааг зохицуулахад оршино.

1.2. Энэхүү журмын 1.1-д заасан харилцааг зохицуулахад Үнэт цаасны зах зээлийн тухай хууль, Иргэний хууль, Компанийн тухай хууль тэдгээртэй нийцүүлэн гаргасан хууль тогтоомжийн бусад акт болон энэ журмыг мөрдлөг болгоно.

1.3. Энэхүү журам нь үнэт цаасаар гэрчлэгдсэн өмчлөх эрхийг бусдад бэлэглэх, өвлүүлэхээс бусад арга, хэлбэрээр үнэт цаасаар гэрчлэгдсэн өмчлөх эрхийг бусдад шилжүүлэхтэй холбогдсон харилцаанд үйлчлэхгүй.

1.4. Энэхүү журамд зааснаас бусад нарийвчилсан харилцааг зохицуулах журмыг үнэт цаасны төвлөрсөн хадгаламжийн болон кастодианы үйл ажиллагаа эрхлэх этгээд баталж, Санхүүгийн зохицуулах хороо (цаашид “Хороо” гэх)-оор батламжлуулна.

1.5. Үнэт цаасаар гэрчлэгдсэн өмчлөх эрхийг гагцхүү тухайн үнэт цаасыг өмчлөгч, эсхүл түүний эрх олгосон итгэмжлэгдсэн төлөөлөгч бусдад бэлэглэж болно. Тухайн үнэт цаасыг өмчлөх эрхгүй буюу хууль ёсны өмчлөгчийг итгэмжлэлийн үндсэн дээр төлөөлөх эрхгүй этгээд үнэт цаасаар гэрчлэгдсэн өмчлөх эрхийг бусдад шилжүүлэхийг хориглоно.

1.6. Үнэт цаасаар гэрчлэгдсэн өмчлөх эрхийг бэлэглэл, эсхүл өв залгамжлалын журмаар шилжүүлэн авч байгаа иргэн, хуулийн этгээд нь үнэт цаасны төлбөр тооцоо, хадгаламж, кастодианы үйл ажиллагаа эрхэлж буй байгууллагад өөрийн нэр дээр урьдчилан данс нээлгэсэн байх ба үйлчилгээний шимтгэл төлөхөд хангалттай хэмжээний мөнгөн хөрөнгийг байршуулсан байна.

Хоёр. Хороо болон зохицуулалттай этгээдийн эрх үүрэг

2.1. Хороо дараах эрх, үүргийг хүлээнэ:

2.1.1. Хороо шаардлагатай тохиолдолд хяналт шалгалтын үйл ажиллагаа явуулна;

2.1.2. хянан шалгалтын явцад зөрчил илэрсэн тохиолдолд холбогдох хуульд заасны дагуу арга хэмжээ авна;

2.2. Үнэт цаасны төлбөр, тооцоо, хадгаламж болон кастодианы үйл ажиллагаа эрхлэх этгээд дараах эрх үүргийг хүлээнэ:

2.2.1. үнэт цаасны төлбөр, тооцоо, хадгаламж, кастодианы үйл ажиллагаа эрхлэх байгууллага нь үнэт цаасаар гэрчлэгдсэн өмчлөх эрхийг бусдад бэлэглэл болон өв залгамжлалын журмаар шилжүүлэх үйлчилгээний шимтгэлийг дотооддоо тогтоож мөрдүүлнэ;

2.2.2. энэхүү журмын 2.2.1-д заасан үйлчилгээний шимтгэлийг тогтоосон үнийн дүнгээр тооцон авна;

2.2.3.үнэт цаасны хадгаламжийн үйл ажиллагаа эрхлэх байгууллага нь хууль тогтоомж, дүрэм журмаар тогтоосон шаардлагыг хангасан үнэт цаасаар гэрчлэгдсэн өмчлөх эрхийг бусдад бэлэглэл, эсхүл өв залгамжлалын замаар шилжүүлсэн тухай бүртгэлийг хийж, тухай бүр үнэт цаасны төлбөр, тооцооны байгууллагад мэдээллэнэ;

2.2.4.энэхүү журмын 2.2.3-т заасан мэдээлэлд үндэслэн үнэт цаасны төвлөрсөн хадгаламжийн үйл ажиллагаа эрхлэх байгууллага нь өмчлөх эрхийн бүртгэлд тухай бүр өөрчлөлт оруулан нэгдсэн бүртгэл хөтөлнө;

2.2.5.үнэт цаасны хадгаламжийн үйл ажиллагаа эрхлэх байгууллага нь энэхүү журмын 2.2.4-д заасан үүргийг хэрэгжүүлэхдээ үнэт цаасаар гэрчлэгдсэн өмчлөх эрх эзэмшигчээс үйлчилгээний шимтгэл тооцохгүй;

2.2.6.үнэт цаасны төлбөр, тооцооны үйл ажиллагаа эрхлэх байгууллага нь үнэт цаасаар гэрчлэгдсэн өмчлөх эрхийг бэлэглэл болон өв залгамжлалын журмаар бусдад шилжүүлсэн аливаа гүйлгээний талаарх дараах мэдээллийг гүйлгээ хийснээс хойш ажлын 1 өдрийн дотор нийтийн хүртээл болгох үүрэгтэй:

2.2.6.1.үнэт цаас гаргагчийн оноосон нэр, үнэт цаасны нэр, төрөл, код;

2.2.6.2.өмчлөх эрх шилжсэн арга;

2.2.6.3.өмчлөх эрх шилжсэн үнэт цаасны тоо;

2.2.6.4.өмчлөх эрх шилжсэн үнэт цаасны нийт дүн нь тухайн үнэт цаасыг гаргасан хуулийн этгээдийн нийт гаргасан үнэт цаасны хэдэн хувийг эзэлж буй тухай.

Гурав. Үнэт цаасаар гэрчлэгдсэн өмчлөх эрхийг бусдад бэлэглэх

3.1.Бэлэглэж буй үнэт цаасыг өмчлөх эрх нь тухайн үнэт цаасны өмчлөгчийн бүртгэлд үнэт цаасны төлбөр, тооцоо, хадгаламжийн үйл ажиллагаа эрхлэх болон кастодианы байгууллага, өөрчлөлт оруулж бэлэг хүлээн авагчийн нэр дээр өмчлөх эрхийг бүртгэснээр шилжинэ.

3.2.Бэлэглэгч иргэн нь өөрийн эхнэр, эсхүл нөхөр, өөрийн болон эхнэр, эсхүл нөхрийн төрүүлсэн болон үрчилсэн эцэг, эх, өвөг эцэг, эмэг эх, авга, нагац, ах, эгч, дүү, төрүүлсэн болон үрчилж авсан хүүхэд, ач зээ, тэдгээрийн хүүхэд зэрэг төрөл, садангийн хүнээс гадна хүргэн, бэрд бэлэглэж байгаа бол дараах баримт бичгийг бүрдүүлсний үндсэн дээр өмчлөх эрхийг шилжүүлэх хүсэлтийг гаргана:

3.2.1.галуудын хооронд бичгээр байгуулсан бэлэглэлийн гэрээний нотариатаар баталгаажуулсан хуулбар;

3.2.2.бэлэглэгч, бэлэг хүлээн авагчийн хүсэлт, мэдэгдэл (энэхүү журмын 1 дүгээр хавсралт ёсоор батлагдсан маягтын дагуу гаргана);

3.2.3.энэхүү журмын 3.2-т заасан төрөл садангийн талаарх иргэний бүртгэлийн байгууллагын лавлагаа, эсхүл уг холбоог нотлох бусад баримт;

3.2.4.шаардлагатай бусад.

3.3.Бэлэглэгч нь энэхүү журмын 3.2-т зааснаас бусад иргэн, хуулийн этгээдэд бэлэглэж байгаа бол дараах бичиг баримтыг бүрдүүлсний үндсэн дээр өмчлөх эрхийг шилжүүлэх хүсэлтийг гаргана:

3.3.1.галуудын хооронд бичгээр байгуулсан бэлэглэлийн гэрээний нотариатаар баталгаажуулсан хуулбар;

3.3.2.бэлэглэгч, бэлэг хүлээн авагчийн хүсэлт, мэдэгдэл (энэхүү журмын 1 дүгээр хавсралт ёсоор батлагдсан маягтын дагуу гаргана);

3.3.3.бэлэглэгч нь компани бөгөөд тухайн бэлэглэл нь их хэмжээний буюу сонирхлын зөрчилтэй хэлцэлд тооцогдохоор бол холбогдох эрх бүхий этгээдийн шийдвэр.

3.4.Энэ журмын 3.2.1, 3.3.1-т заасан бэлэглэлийн гэрээнд дараахь зүйлийг заавал тусгана:

3.4.1.бэлэглэгч болон бэлэг хүлээн авагчийн овог, нэр, иргэний бүртгэлийн дугаар, оршин суух хаяг, холбоо барих утасны дугаар (хуулийн этгээд бол оноосон нэр, улсын бүртгэлийн дугаар, оршин суух хаяг болон холбоо барих утасны дугаар), талуудын дансны дугаар;

3.4.2.бэлэглэж буй үнэт цаасны төрөл, тоо;

3.4.3.бэлэглэж буй үнэт цаас нь бусдад худалдагдаагүй, барьцаалагдаагүй, битүүмжлэгдээгүй тухай мэдэгдэл.

Дөрөв. Үнэт цаасаар гэрчлэгдсэн өмчлөх эрхийг бусдад өвлүүлэх

4.1.Үнэт цаасаар гэрчлэгдсэн өмчлөх эрхийг хуульд зааснаар өвлөгч иргэн нь Иргэний хуульд заасан журмын дагуу өөрийн өвлөх эрх үүссэн болон өв нээгдсэн тухай холбогдох баримтыг үнэт цаасны төлбөр, тооцоо, кастодианы үйл ажиллагаа эрхлэх байгууллагад гаргаж өгөх замаар өмчлөх эрхийг өөрийн дансанд шилжүүлэн авч болно.

4.2.Үнэт цаасны төлбөр, тооцоо, кастодианы үйл ажиллагаа эрхлэх байгууллага нь үнэт цаасаар гэрчлэгдсэн өмчлөх эрхийг хуульд зааснаар өвлөгч иргэний өмчлөлд шилжүүлэх ажиллагааг гүйцэтгэхдээ Иргэний хуульд заасан журмын дагуу өв нээгдсэн эсэх, хүсэлт гаргасан иргэнд өвлөх эрх үүссэн эсэх болон тухайн үнэт цаасыг өвлөх өөр бусад эрхтэй иргэн байгаа эсэх (хууль ёсны дагуу болон гэрээслэлээр), хэрэв байгаа бол тэдгээр нь өвөөс татгалзсан эсэх зэрэг асуудлыг холбогдох баримтад үндэслэн тогтоосны үндсэн дээр гүйцэтгэнэ.

4.3.Үнэт цаасны төлбөр тооцоо, кастодианы үйл ажиллагаа эрхлэх байгууллага нь үнэт цаасаар гэрчлэгдсэн өмчлөх эрхийг гэрээслэлийн дагуу шилжүүлэхэд Иргэний хуульд заасан журмын дагуу үйлдсэн гэрээслэл, түүнд дурдсан үнэт цаасны тоо нь тухайн дансанд байгаа эсэх, өв нээгдсэн эсэх, гэрээслэлээр өв хүлээн авагч нь өвийг хүлээн авах хүсэл зоригоо илэрхийлсэн эсэх зэрэг асуудлыг холбогдох баримтад үндэслэн тогтоосны үндсэн дээр гүйцэтгэнэ.

4.4.Өв залгамжлалын журмаар шилжүүлэх үнэт цаасны тоо нь өвлүүлэгчийн дансанд байгаа үнэт цаасны тоо хэмжээнээс зөрсөн нөхцөлд үнэт цаасны төлбөр, тооцоо, кастодианы үйл ажиллагаа эрхлэх байгууллага нь энэ талаар хүсэлт гаргагчид мэдэгдэж шаардлагатай арга хэмжээг авна.

Тав. Мэдээллийн ил тод байдал

5.1.Бэлэглэл болон өв залгамжлалын замаар үнэт цаасаар гэрчлэгдсэн өмчлөх эрхийг шилжүүлэх явцад өмчлөх эрхийн талаар маргаан гарсан, эсхүл өмчлөх эрх нь тодорхойгүй, хянан шалгах шаардлагатай, эсхүл уг өмчлөх эрхтэй холбоотой эрх бүхий байгууллага шалгалт явуулж байгаа бол энэ тухай мэдсэн даруй үнэт цаасны төлбөр тооцоо, хадгаламж болон кастодианы үйл ажиллагаа эрхлэх байгууллага нь холбогдох гүйлгээ, төлбөр тооцооны үйлчилгээг гүйцэтгэх ажиллагааг зогсоож, энэ талаар Хороонд мэдэгдэнэ.

5.2.Бэлэглэл болон өв залгамжлалын замаар үнэт цаасаар гэрчлэгдсэн өмчлөх эрхийг шилжүүлэх явцад энэхүү журмын 5.1-д заасан маргаан үүссэн тохиолдолд холбогдох эрх

бүхий байгууллагаас эцсийн шатны шийдвэр гарсан үед өмчлөх эрх шилжүүлэх эсэхийг шийдвэрлэнэ.

5.3. Үнэт цаасны төлбөр, тооцооны үйл ажиллагаа эрхлэх байгууллага нь тухайн улирал бүрд үнэт цаасаар гэрчлэгдэх өмчлөх эрхийг бэлэглэлийн журмаар шилжүүлэх гүйлгээний талаарх тайланг энэхүү журмын 2 дугаар хавсралтаар баталсан маягтын дагуу, өв залгамжлалын журмаар шилжүүлэх гүйлгээний талаарх тайланг энэхүү журмын 3 дугаар хавсралтаар баталсан маягтын дагуу гаргаж дараа улирлын эхний сарын 10-ны өдрийн дотор Хороонд ирүүлнэ.

5.4. Үнэт цаасаар гэрчлэгдэх өмчлөх эрхийг бэлэглэл болон өв залгамжлалын журмаар шилжүүлэх гүйлгээ тус бүрээр тайланд тусгана.

5.5. Энэхүү журмын дагуу тодорхой компанийн нийтэд санал болгон гаргасан хувьцааны 5 буюу түүнээс дээш хувьтай тэнцэх хэмжээний хувьцааны өмчлөх эрхийг шилжүүлэн авсан иргэн, хуулийн этгээд өөрийн өмчлөлд шилжүүлж авснаас хойш ажлын 10 хоногийн дотор Хороонд мэдэгдэх үүрэгтэй.

5.6. Компанийн хувьцааны хяналтын багцыг эзэмшиж буй иргэн, хуулийн этгээд нь үнэт цаасаар гэрчлэгдсэн өмчлөх эрхээ бэлэглэлийн замаар бусдад шилжүүлж буй тохиолдолд энэ тухай бэлэглэлийн гэрээг байгуулахаас өмнө ажлын 5-аас доошгүй хоногийн өмнө олон нийтэд хэвлэл, мэдээллийн хэрэгслээр нэгээс доошгүй удаа мэдээлж, энэ талаар өөрийн бүртгэлтэй үнэт цаасны арилжаа эрхлэх байгууллагад болон Хороонд мэдэгдэнэ:

5.6.1. Энэхүү журмын 5.6-д заасан олон нийтэд хүргэх мэдэгдэлд бэлэглэж буй үнэт цаасны төрөл, нийт бэлэглэх үнэт цаасны тоо, бэлэг хүлээн авагчийг тодорхойлсон үндэслэлийг тусгасан байна;

5.6.2. Энэхүү журмын 5.6-д заасан өөрийн бүртгэлтэй үнэт цаасны арилжаа эрхлэх байгууллага болон Хороонд ирүүлэх мэдэгдэлд олон нийтэд тараасан мэдээллээс гадна бэлэглэгчийн овог, өөрийн нэр, регистрийн дугаар, /хуулийн этгээд бол оноосон нэр, улсын бүртгэлийн дугаар, холбоо барих утасны дугаар, хаяг байршил/ дансны дугаарыг /хэрэв бэлэг хүлээн авагч нь тодорхой бол түүний дансны дугаарыг/ заавал тусгасан байна.

Зургаа. Хариуцлага

6.1. Энэхүү журмыг зөрчсөн этгээдэд холбогдох хууль тогтоомжид заасан хариуцлагыг хүлээлгэнэ.

“Үнэт цаасаар гэрчлэгдсэн өмчлөх эрхийг бусдад бэлэглэх, өвлүүлэх тухай журам”-ын 1 дүгээр хавсралт

БЭЛЭГЛЭГЧ, БЭЛЭГ ХҮЛЭЭН АВАГЧИЙН ХҮСЭЛТ, МЭДЭГДЭЛ

1. Хүсэлт гаргагчийн талаарх мэдээлэл

Бэлэглэгч	Бэлэг хүлээн авагч
Иргэн/ Хуулийн этгээдийн нэр: _____	Иргэн/ Хуулийн этгээдийн нэр: _____
<i>(Иргэний овог, эцгийн нэр, өөрийн нэр, Хуулийн этгээдийн оноосон нэр)</i>	<i>(Иргэний овог, эцгийн нэр, өөрийн нэр, Хуулийн этгээдийн оноосон нэр)</i>
Иргэн/Хуулийн этгээдийн регистрийн дугаар: _____	Иргэн/Хуулийн этгээдийн регистрийн дугаар: _____
Иргэний үнэмлэхний /Хуулийн этгээдийн улсын бүртгэлийн гэрчилгээний дугаар _____	Иргэний үнэмлэхний /Хуулийн этгээдийн улсын бүртгэлийн гэрчилгээний дугаар _____
Оршин суух хаяг: _____	Оршин суух хаяг: _____
Шуудангийн хаяг: _____	Шуудангийн хаяг: _____
Холбоо барих утас: _____	Холбоо барих утас: _____

2. Хүсэлтийн талаарх тэмдэглэл

Бэлэглэгч миний өмчлөлд байгаа _____ тоот дансанд байршиж буй _____-ийн гаргасан _____ /тоогоор/ _____
(Үнэт цаас гаргагчийн оноосон нэр)

_____ /үсгээр/ ширхэг энгийн хувьцаа, давуу эрхийн хувьцаа, өрийн бичиг /доогуур зурах/-ийг бэлэг хүлээн авагчийн _____ тоот дансанд байршуулах гүйлгээг хийж, өмчлөх эрхийг шилжүүлж өгөхийг хүсье.

3. Хүсэлт гаргагчийн мэдэгдэл

Бэлэглэгч, бэлэг хүлээн авагч бид энэхүү бэлэглэлийн үйлдлийг хийхдээ бэлэглэж буй үнэт цаастай холбоотой бусдын өмнө хүлээсэн ямар нэг /татвар, хураамж, төлбөр төлөх, ажил гүйцэтгэх, үйлдэл хийх гэх мэт/ үүргээс зайлсхийхийг зориогүй, худалдах, худалдан болон бусад ямар нэг хэлцлийг халхавчлах зорилгоор хийгээгүй болно. Энэхүү мэдэгдэл нь худал, хуулийн хүчин төгөлдөр бус байвал бидний байгуулсан хэлцлийг буцааж, бидний хүсэл зоригоос үл хамааран гүйлгээг хүчингүй болгоход татгалзах зүйлгүй бөгөөд холбогдох хохирлыг бүрэн хариуцаж, хуулийн хариуцлага хүлээхээ үүгээр мэдэгдэж байна.

Бид энэхүү хүсэлтийн дагуу үнэт цаасаар гэрчлэгдсэн өмчлөх эрх шилжихтэй холбоотой, хууль тогтоомжоор харилцан болон бусдын өмнө хүлээх үүрэг хариуцлагыг бүрэн ухамсарлаж, шаардлагатай үйлдлийг зохих журмын дагуу, тогтоосон хугацаанд гүйцэтгэх болно.

ХҮСЭЛТ, МЭДЭГДЭЛ ГАРГАСАН

БЭЛЭГЛЭГЧ / _____ /: _____
(Иргэний овог, эцгийн нэр, өөрийн нэр, Хуулийн этгээдийн төлөөлөгчийн овог, нэр) (Гарын үсэг)

БЭЛЭГ ХҮЛЭЭН АВАГЧ / _____ /: _____
(Иргэний овог, эцгийн нэр, өөрийн нэр, Хуулийн этгээдийн төлөөлөгчийн овог, нэр) (Гарын үсэг)

Хүсэлт гаргасан хугацаа: оны дүгээр сарын-ны өдөр цаг..... минут

Тусгай тэмдэглэл

/Энэ хэсэгт зөвхөн үнэт цаасны төлбөр, тооцооны үйл ажиллагаа эрхлэх байгууллагын ажилтан тэмдэглэл үйлдэнэ./

Хүлээн авсан----- **ийн** _____ **албан тушаалтай**

(Үнэт цаасны хадгаламжийн байгууллагын нэр)
 / _____ / _____
(овог, нэр) (гарын үсэг)

Хүлээн авсан хугацаа: оны дүгээр сарын-ны өдөр цаг минут

ҮНЭТ ЦААСААР ГЭРЧЛЭГДСЭН ӨМЧЛӨХ ЭРХИЙГ БЭЛЭГЛЭЛИЙН
ЖУРМААР ШИЛЖҮҮЛСЭН ГҮЙЛГЭЭНИЙ
... ОНЫ ... ДҮГЭЭР УЛИРЛЫН ТАЙЛАН

Тайлан гаргасан хугацаа: оны сарын өдөр
Тайлангийн хамарсан хугацаа: оны сарын өдрөөс оны сарын өдөр

Д/д	Гүйлгээ хийсэн огноо	Тухайн гүйлгээгээр өмчлөл шилжүүлсэн үнэт цаасны нэр, тоо ¹	Тухайн гүйлгээгээр өмчлөх эрх шилжүүлсэн үнэт цаасны нэгжийн үнэ ²	Гүйлгээний үнийн дүн	Үйлчилгээний шимтгэлийн хувь	Үйлчилгээний шимтгэлийн үнийн дүн	Бэлэглэгчийн дансны дугаар	Бэлэглэгчийн овог, нэр	Бэлэглэгчийн иргэний бүртгэлийн дугаар	Бэлэг хүлээн авагчийн дансны дугаар	Бэлэг хүлээн авагчийн овог, нэр	Бэлэг хүлээн авагчийн иргэний бүртгэлийн дугаар	Бэлэглэгч, бэлэг хүлээн авагчийн хоорондын холбооны тухай ³

Тухайн улиралд хийгдсэн гүйлгээний нийт үнийн дүн: _____
Тухайн улиралд хийгдсэн гүйлгээнээс Санхүүгийн зохицуулах хороонд төлсөн зохицуулалтын үйлчилгээний хөлсний нийт үнийн дүн: _____

Гүйцэтгэх захирал:



_____ / _____ /
(Овог, нэр) (гарын үсэг)

Тайлан гаргасан ажилтан:

_____ (Албан тушаал) _____ (Овог, нэр) _____ (гарын үсэг)

¹ Тайлбар: Нэг хүсэлт, мэдэгдлээр нэгээс дээш төрлийн үнэт цаас шилжүүлсэн тохиолдолд тус бүрийг харгалзах нүдэнд багтсан дэд нүд тус бүрт бичнэ.
² Тайлбар: Журмын 1.15-д заасны дагуу тогтоосон үнэ
³ Тайлбар: Журмын 2.2-т заасан холбооны талаар

**ҮНЭТ ЦААСААР ГЭРЧЛЭГДСЭН ӨМЧЛӨХ ЭРХИЙГ ӨВ ЗАЛГАМЖЛАЛЫН
ЖУРМААР ШИЛЖҮҮЛСЭН ГҮЙЛГЭЭНИЙ
... ОНЫ ... ДҮГЭЭР УЛИРЛЫН ТАЙЛАН**

Тайлан гаргасан хугацаа: оны сарын өдөр
Тайлангийн хамарсан хугацаа: оны сарын өдрөөс оны сарын өдөр

Д/д	Гүйлгээ хийсэн огноо	Тухайн гүйлгээгээр өмчлөл шилжүүлсэн үнэт цаасны нэр, тоо ¹	Тухайн гүйлгээгээр өмчлөх эрх шилжүүлсэн үнэт цаасны нэгжийн үнэ ²	Гүйлгээний үнийн дүн	Үйлчилгээний шимтгэлийн хувь	Үйлчилгээний шимтгэлийн үнийн дүн	Өвлүүлэгчийн дансны дугаар	Өвлүүлэгчийн овог, нэр	Өвлүүлэгчийн иргэний бүртгэлийн дугаар	Өвлүүлэгчийн нас барсны гэрчилгээний дугаар	Өв залгамжлагчийн дансны дугаар	Өв залгамжлагчийн овог, нэр	Өв залгамжлагчийн иргэний бүртгэлийн дугаар
1.													
2.													
3.													

Тухайн улиралд хийгдсэн гүйлгээний нийт үнийн дүн: _____
Тухайн улиралд хийгдсэн гүйлгээнээс Санхүүгийн зохицуулах хороонд төлсөн зохицуулалтын үйлчилгээний хөлсний нийт үнийн дүн: _____

Гүйцэтгэх захирал: Т А М _____ /
(Овог, нэр) (гарын үсэг)

Тайлан гаргасан ажилтан: _____ /
(Албан тушаал) (Овог, нэр) (гарын үсэг)

¹ Тайлбар: Нэг хүсэлт, мэдэгдлээр нэгээс дээш төрлийн үнэт цаас шилжүүлсэн тохиолдолд тус бүрийг харгалзах нүдэнд багтсан дэд нүд тус бүрт бичнэ.
² Тайлбар: Журмын 1.15-д заасны дагуу тогтоосон үнэ

